

林膳部詩小序

卷七

閩人詩學昉自子羽及門弟子彬彬蔚起附之成名者衆矣無錫浦長源不遠二千里往與論詩贈答篇什後世競爲佳話大抵子羽諸體俱工其尤勝者五言古早入陳拾遺之室大有開元風五言律固無多篇警絕處自是大曆一派卽降置錢劉集中其性情發露當必有餘妍也王元美最刻論前輩稱爲小乘法僅足生天夫生天亦甚難矣哉然攷子羽生平所獲受知天子者實以臨軒所試龍池春曉孤雁二詩聲震當時今閱此二詩反不

甚佳蓋遇合之作未可以定人所造固如此論者  
乃謂後來閩詩庸靡之病開派子羽彼其刺譏或  
不在昔亦猶借毀少陵以攻崆峒云爾豈正言之  
耶發江黃昌衢識

蔡照樓明二十四家詩定卷七

婺江黃昌衢康謠選

昌侃庭直

元治自先叅 弟昌儼若思全較

兄

鴻猷方叔訂

昌僑若產

林鴻

鴻字子羽福清人洪武初以人才薦歷官膳部員外郎

五言古詩

無諸釣龍臺懷古

三首

無諸昔建國赤土疏王封築臺青冥上垂釣滄江  
龍乘龍去不返千載如飛篷只今荒臺上寂歷多  
遺蹤我有太古懷來吟江上峯天青海氣滅地古

寒烟濃潭水綠萬丈秋岑碧千重登臨未能已落  
日催孤鐘

甌閩古夷服無諸漢英雄秦鹿既已歿却辭隆準  
翁組練照海色旌旗來故宮赫矣茅土業大哉開  
闢功事往滄海變龍飛霸圖空昔日釣龍臺空餘  
江水中桂殿苔色古空陵雲氣紅朝夕卷寒潮隱  
隱聞雷風登臨畢餘景感嘆無終窮

無諸東海上有國在秦先一朝逐秦鹿戈甲相勾  
連高才已得志論封亦徒然歸來築高臺投竿釣  
蜿蜒屠龍雄按劍拂拭滄州烟英風振海岳古月  
經蠻天昔人不可見蹤跡復堪憐閑來弄秋水漁  
情藹清川雲高碧海淨日落千山妍筦歌古臺上  
醉向酒家眠

感秋

四時互相竭兩曜無停軸夏炎方滿盈秋氣忽已  
肅空閨有佳人十載常獨宿中心豈不貞處闇誰  
見燭願爲明月珠流光照君屋

寄衣曲

漢月絳庭樹胡霜拂城樓邊人一夜寒深閨始知  
秋起來理征衣織手一何柔雙杵幾不勝寸心未

能休梧葉下淅淅草蛩閑幽幽月明嗟慰意風急  
復含愁白露下蘭心蘭心亦枯槁妾家有高臺下  
有漁陽道明發寄征人三挹薜蘿草

海上讀書

浮雲薄海色萬里如秋空青蒼杳無際島嶼蟠蛟  
龍上有讀書者結茅誰與同朝飡海上霞夕友滄  
江翁乘桴嗟尼父把釣思任公猶慕魯連子不受  
却秦功千金若土壤清名弔高風愧予老儒術白  
首且相從

飲酒

儒生好奇古出口談唐虞倘生羲皇前所談乃何  
如古人既已歿古道存遺書一語不能踐萬卷徒  
空虛我願但飲酒不復知其餘君看醉鄉人乃在  
天地初

金雞岩僧室

遠公青蓮宇百尺構雲闕一徑入松蘿山泉濯苔  
髮石房彈玉琴清響在林樾夜來滄海寒夢遶波  
上月微吟白雲篇高興了未輟未能悟聲聞安得  
離言說

遊芙蓉峯

密竹不知路渡溪微有蹤懸知石上約定向松間  
逢物候變黃鳥萑蒲化蒙茸相望不可卽裊裊霜  
天鍾

題江閣秋雲圖

山雲初斂夕雲氣已歸壑何以散冲襟孤峯坐江  
閣美人期不來天寒楓葉落

同周秀才玄與東白明遠二上人期宿芝山  
不至

塵居厭紛擾恒思宿陰岑夙期道門友共茲清夜  
吟彈冠起新沐微風披素襟行行止空門夕景倏  
已沉不見雲中僧虛堂閉烟林應物本無往焉知  
來去心良會旣已睽中情一何深詠歸值新月聊  
復鳴吾琴

經東山別墅

野墅在東山經過感疇昔縱橫醉時墨猶在池上  
石林氣颯以涼山容淡將夕緬懷攜手人念念不  
能釋

送湖南歸粵

志士本激烈况當離別情直氣不得發逢秋吐商  
聲浮雲蔽長空驅馬去孤城廣川無輿梁一葦詎

能橫將尋故山隱自芟荒草畊蠹書束高閣龍劍  
日夜鳴行路由正途能使山岳平端居息機心臥  
聞螻蟻爭知君重交結臨分吐平生

送尚抱灌往閩南采詩

予生草澤間鼓腹歌唐虞柰何際板蕩奮劍當前  
驅千金酬壯士白璧買良姝放蕩裘馬間嗜酒縱  
樗蒲市朝旣變更部曲歸里閭三十始讀書謬爲  
章句儒閉門謝賓從窮巷生寒蕪南山旣嘯傲擊  
節聊自娛故人西北來將歸滄海隅自言河岳英  
以俟觀風車忽忽僕馬疲寥寥歲云徂積雪照天  
地嚴冰寒江湖祖席臨東門欲發仍躊躇贈之五  
雲章飲以雙玉壺

送黃佐之京

予也夙穎悟十五知論文結交皆老蒼稚爪攀修  
鱗冥心三十年尋源頗知津探佐始有得服膺如  
獲珍誓將覺後生庶以酬先民干祿鏞水庠歲星  
七周循青衿二十徒達者唯黃聞三十爲禮官制  
作多述因前年乞骸歸甘作隱逸倫業窮道豈遷  
操危氣愈伸持此欲有授二佐乃其人時登烏石  
山眺遠滄海濱逸興發猿嘯閑情投鳥羣旣與簪

紱疎頗同緇錫隣朝遊必竟夕夜吟常達晨放曠  
宇宙間外視埃壘身匏斟日動爵劍舞風披巾醉  
來各鴟張揮洒如有神坐或藉青草倦應眠白雲  
大運迭盈虛人事常參辰詎知同心者胡爲遽離  
分于時維孟冬膏車戒征輪借問子何之囊書上  
成均執手念門友登堂辭老親驅馬西郭門祖帳  
螺江潯朔風捲行旆木脫波粼粼請爲壯士吟庶  
以攄中懃丈夫志四海况茲觀國賓惜別語刺刺  
無乃兒女仁壯懷何以贈臨岐解青蘋

終南積翠

終南太古色積翠無冬春陽厓俯荆楚陰壑開函  
秦碧樹曉未分蒼蒼散參辰下蟠螭水龍上有避  
世人有時浮爽氣拄笏可攬結安得構精廬談經  
對松雪

畱別諸子

秋堂闕虛寒晚竹引深翠暝然孤燈坐興與一壺  
對天冷霜滿襟露飲月窺醉曲盡別意深相看發  
長喟

精巖寺

香刹象天界名僧辭世氛一峯獨凌削衆壑相氤



氲作禮向金仙宴林投鶴羣山犬銜人衣却走避  
腥葷於是春向暮林亭藹餘曛蒼然草木氣盡濕  
西江雲登閣見千里眇懷滄海濱山鐘忽播蕩應  
此悟音聞

別龍秀才

龍生不羈者愛士能開襟每醉玉壺酒復爲梁甫  
吟訪余鑪水陽又將歸故林秋風樽前別落日川  
上心四郊已蕭條千里無飛禽離思苦難說言遠  
猶登臨

同王六博士宿烟霞觀

昔人煉金鼎此地餘還丹至今風篁鳴猶疑下笙  
鸞出嶺訪靈異投山宿天壇一片月色古千秋松  
影寒醴泉爲我酒丹霞爲我食都無世人夢但佇  
風中翰夫子苟有意相期此投冠到家興未已更  
取吾琴彈

翠簾山天湖

翠簾高凌天峯麓曠且平何年此蟠龍遂成秋水  
泓呼吸納元氣溟濛變陰晴雲雷地中起日月波  
上生上有空僧巢巖栖煉神形寥寥水月觀洞見  
心胸明我昔凌天梯恍若登赤城浮杯動松影發

笑回天聲從茲便高舉永極雲霞情

同王六入西山尋白雲僧

秋山晚蒼蒼引興白雲際方聞出谷鐘未返沿源  
騎躋攀霽心日始到三摩地苔色陰際寒松聲靜  
中細空僧此岩棲心寂跡如寄經誦有時閑了了  
見山翠抱琴者誰子夙性貪幽致雲臥復何爲冰  
弦寫秋意西峯倏舍景石榻又假寐身寄孤鶴巢  
夢如幽蘭氣夜分氣候白隱隱月初至陽礪澹空  
明陰林破深邃久懷緇錫隣頗與雲山契章甫如  
可投期君訪靈異

道中偶詠

林館夕暫休星駕曉仍發沉沉樹若烟浩浩溪如  
雪白首倦長途青山笑予拙

宿黃梅五祖寺

佛祖說法處迥與諸天鄰珠宮歷浩劫桂殿餘真  
身登攀訪靈異禮謁知宿因地遠泉石怪人閒猿  
鳥馴松杉覆窻戶濕竹清衣巾花雨出深夜天香  
來暮春久知簪組妄思與緇錫親所希慧燈影爲  
余照迷津

送吳士顯

吳生跌宕人脫略當世事欲識平生心悠悠江海  
是布衣何飄飄孤劍千里至斗酒未及歡看雲起  
歸思長風吹古城寒石下秋水分手從此辭車塵  
望中起

同鄭二宣江上泛舟

載酒入江色酒多江復長酣來散予纓濯向春流  
香東壁過疎雨西崦殘夕陽猿禽相嘯叫雲水共  
清蒼夕景更汎覽客程殊未央魚風葦上起蚌月  
波中光嘗以事泮渙永期名迹忘乘槎予豈必聊  
復咏滄浪

齋中曉起

颺颺城鴉散蓼蓼戍鼓絕空庭寂無人衣上有殘  
月清池盥漱罷高韻風中發爽氣山前來吾襟抱  
冰雪

同諸生登絳月蘭若

金人青蓮宇乃在白雲裏久與名僧期乘閒却來  
此入門聞經梵絳壁見巾履落磻泉影紅侵廊薜  
花紫海天正南豁一望見千里獨樹川上浮孤烟  
島邊起予生况多暇所性樂山水真賞非外求冥  
心巢居子

夜宿郡齋水亭呈林八博士

孤琴水亭夕客至罷鳴彈况有樽中醪斟之罄情  
懽濯足向清泚披襟散塵煩仰見海上月兼之天  
籟寒齋舍何蕭條蓬門若丘樊深竹讀書處百蟲  
鳴夜殘予懷良已舒爲君咏幽蘭

七言古詩

寄王六校文兼似吳二太守

京師三月春雪飛雪後餘寒添着衣曹官祿薄酒  
苦貴一飲百錢恒不醉忽然停杯憶鄉里美髯校  
文最知已作詩判不讓高岑醉後狂吟狂欲歔有

時忽得意竟上金雞山彈琴酌酒送飛鳥心比白  
雲閑更閑虎頭巖前柳拖地龍池溪上花滿灣醉  
歸騎得將軍馬城上烏棲門未關白頭太守別來  
久別後還能相憶否詞賦終爲紙上塵功名不及  
杯中酒芭蕉葉長近何如前日人來不寄書莫言  
閩海少飛雁何事秦淮多鯉魚

賦得獨樹邊淮送人之京

君不見秦淮水流東到海淮邊獨樹如車蓋九月  
微霜赤葉乾枯枝颯颯鳴天籟枝上啼鴉散曙烟  
枝頭殘照咽寒蟬離人畱飲停車騎俠客相逢掛

馬鞭南國高僧從此去駐錫雨花臺下路一飯淮  
邊洗鉢時六時宴坐祇園樹野鶴孤雲任去還禪  
心不到別離難山中亦有長松樹待爾青青共歲  
寒

過高逸人別墅

識子何不早見子卽傾倒世人意氣不相合顏色  
雖同心草草子有園林東海濱香名滿耳人共聞  
梁鴻避世身不仕孔融愛客家常貧茲晨飲客青  
山墅新壓葡萄酒如乳綠樹穿窻鳥當哥紅條拂  
地花能舞醉來興逸無不爲投壺擊劍仍彈碁人  
生得意有如此世上悠悠那得知

月夜聞李生彈箏歌

越客本浩蕩秦箏何激揚浮亭子夜月色古一曲  
萬籟鳴清商初聞楚調聲激烈志士報讐思飲血  
再聞宮音如扣鐘曾生揖讓何雍容清和變調有  
如此俠客聞之心欲灰銀甲彈來更嫣然金魚脫  
却渾輕爾吾聞錦瑟五十絃湘靈夜鼓聲淒然遂  
令帝子剖其半遺音尚有秦人傳秦音楚調聲雖  
異今古由來同一致燕市誰知擊筑心吳門孰識  
吹簫意今夜君聞鼓曲聲百杯不醉壯心橫衆賓

枕籍秋衾冷獨倚高梧看月明

經綺岫故宮

行人曉飯青山裏驅馬蒼茫經洛水昔聞綺岫盛  
繁華不謂荒涼今若此憶昔行宮初構時梯岩駕  
壑相逶迤美人桂殿夜看月公子柘弓朝射麋翠  
華一去金門鎖露殿飛螢山葉墮往事吹殘牧笛  
風危基半入樵人火今古消沉能幾回春風依舊  
野花開君王巡狩不復見禾黍空山鳥雀哀

賦得無諸城送浦舍人源歸晉陵

君不見昔時無諸城荒丘斷隴今人耕陵谷烟沉  
知幾代古人精靈竟何在憶昔無諸全盛時都城  
百雉何逶迤連營國步分秦土繪袞王章入漢儀  
山河巍巍那可恃躍馬屠龍今已矣列國猶傳赤  
帝封曲臺尚對滄江水滄江水流去不還故宮落  
日不堪看寶衣夜化空陵火弓劍秋懸古殿寒故  
人西歸從此去策馬秋蕪城下路欲將陳迹問行  
人落葉紛紛不知處

鐔上送僧歸衡山

上人孤閑似雲鶴十五出家住衡岳說法能超最  
上禪持心不受羣疑縛世上誰知來去蹤南窺太

華北遊嵩衲經雁蕩千峰雪定入峨眉半夜鐘于  
今戒臘青松古猶泛慈航到東土楊柳舟中九曲  
雲笏皮笠上三山雨昨夜歸心繞楚天西風杖錫  
又茫然化龍潭畔清秋別回雁峰頭舊日禪

林七欽山莊

此君家住浯水西喬林夾道綠青溪人淳上古大  
庭世客到武陵花處迷深杯盡口見山色高枕四  
時聞鳥啼籬根稚笋看成竹階下飛花踏作泥梓  
柳折來環藥圃野泉引得灌蔬畦人間鍾鼎口不  
道雨裏田園手自犁已沾雞黍遂然諾豫愁冠蓋

將離睽明日却從城市去林間相送草萋萋

巫峽啼猿歌送丘少府歸四明

巫山巫峽連三巴猿啼三聲客思家停舟聽之聲  
未了却過青枝猶裊裊野人乍來錦官城清秋滿  
峽啼猿聲黃牛灘上怨楓落白帝祠前哀月明商  
聲清冽羽聲亂倏忽東崖復西澗久客聞之淚欲  
乾壯夫聽此魂亦斷故人歸臥越山雲憶得啼猿  
歌送君扁舟獨宿剡溪夜叫月三聲誰共聞

寄陳八參軍

憶昔讀書融水陽青山影裏開茅堂結交由來重

意氣使酒或可輕侯王誰言一旦風塵起故里蕭  
條半荆杞立身自許致功名報國誰能論生歿爾  
時正值邊塵昏手攜俘首懸轅門春風走馬綠楊  
道落日臂鷹秋草原功成期將書幕府當路忌才  
棄如土部曲營殘殺氣消關山夢醒秋聲苦比來  
爲儒逢太清石田蕪沒荒春耕當時冠蓋半丘土  
此日交情結弟兄交游惟君年最高每以連枝勗  
我曹天邊落日見孤雁海上秋風吹二毛劍水無  
情入海流憑將霰泪到炎州願爲鄉曲牧童子與  
子高歌同飯牛

五言律詩

出塞曲 四首

從軍呼延塞勒馬單于臺天地兵聲合關河秋色  
來酬恩憑玉劍致遠見龍媒旦夕邊城上喧喧笳  
鼓哀

玉關秋信早未雪授征衣王者因無敵胡塵不敢  
飛三河兵氣盛五道羽書稀日晚笳聲發將軍射  
獵歸

驪馬畫弮弓生爲北塞雄探兵千里外捉騎萬人  
中虎帳秋懸月龍旂莫颭風歸來領旌節立在未



央宮

十五薊門行能探黠鹵情潛兵秋度磧牧馬夜歸  
營苦霧沉旗影飛霜濕鼓聲昨來承密詔東築受  
降城

題福山寺陳鉉讀書堂

窮經不出戶一室古珠宮燈影秋雲裏書聲晚磬  
中開窻明竹雪散帙落松風料得無人到焚香對  
遠公

春日遊道山亭

危亭臨絕頂勝槩昔曾聞野酌薰花氣閑心狎鳥

羣簷前看落日衣上見歸雲半醉題詩去仙凡下  
界分

遊樓雲湖禪室贈日東圭上人得心字

東海到來日西山始布金構雲天路上標月夜湖  
心間偈逢樵客忘機狎野禽寥寥塵想絕相對坐  
禪陰

畱別蔡秀才原

別離無遠近暫去亦傷神正是千山雪誰悲獨往  
人江空螺女夜花暗冶城春不見同遊侶酣歌淚  
滿巾

塞上逢故人

五陵攜手罷疋馬各天涯出塞難爲客逢君似到家  
後期如夢寐前路正風沙只好長安陌垂鞭醉落花

送高郎中使北

漢使臨邊日天驕已請和看花辭紫陌犯雪渡交河  
水草畱行帳雲沙想玉珂誰知清漠北婁敬策居多

月夜酌別龍秀才

共向孤城別愁爲永夜吟一竿滄海去千里白鷗

心短髮秋同老清樽月共斟冶城多酒伴遲爾寄徽音

江上寄巴東故人

我憶巴東客長爲江上吟楚雲將夜夢湘月寄愁心  
落日青楓樹秋風白帝砧遙傳一紙淚讀罷想沾襟

宿雲門寺

龍宮臨水國鳥道入烟蘿海曠知天盡山空見月多  
鶴歸僧自老松偃客重過便欲依禪寂塵纓可柰何

送周生往雷州

寧親歸未得念子復南征風雨孤舟別滄波幾日  
程挂帆辭海國吹笛上邊城旅館知相憶新秋有  
雁聲

秋日同韓佖登凌霄臺

故人多逸興携手上高臺賦爲閑居作懷因遠眺  
開秋陰將日去雁影帶寒來歸路瞻衡宇松門掩  
綠苔

送殷秀才之武功

送君遠行役覲省入西秦五月臺江水孤舟去國

人蒼山低戍壘野日暗行塵無限同遊意分攜淚  
滿巾

徵書後呈治城同志

青門初稅駕紫陌罷鳴珂野興看山盡花時中酒  
過同心難契闊失路易蹉跎又欲羈塵綬幽期可  
柰何

早秋有述寄林八先輩

澤國風雨後貧居離索情亂蛩鳴曙井一葉落秋  
城薙篔邀涼早荷衣却暑輕清冷臺下路攜手幾  
時行

夜泊淮陰

泊舟淮水次津樹暗蕭蕭遠火明漁舫長吟倚客  
簫夜鐘聞古寺寒月照歸潮莫近啼猿處愁多夢  
更遙

七言律詩

春日遊東苑應制

長樂鐘鳴玉殿開千官步輦出蓬萊已教旭日催  
龍馭更借春流泛羽杯堤柳欲眠鶯喚起宮花乍  
落鳥啣來宸遊好續簫韶奏京國于今有鳳臺  
春日陪車駕幸蔣山應制

鍾山月曉樹蒼蒼鳳輦乘春到上方馴鳥不隨天  
仗散曇花故落御衣香珠林霽雪明山殿玉澗飛  
泉近苑墻自媿才非枚乘匹也陪巡幸沐恩光

雪夜張尚書籌招飲以事不赴

南宮倬值雪晴時凍雀無聲隱竹埤貰酒暫同寒  
夜飲盍簪深負故人期雲垂絳闕知天近月浸霜  
簾覺曙遲除却安禪與招隱此身此外欲何爲

題中天樓觀圖

海上仙山接混茫仙居遠在白雲鄉樓當太乙星  
辰近樹拂勾陳雨露香絳節馭風來阿母玉簫吹

月醉周王可憐八駿歸來晚蕭颯蛾眉兩鬢霜

呈浦舍人

無諸臺下乍秋風客舍逢君興不窮性僻共耽詩  
句險愁多却仗酒杯空平蕪一騎經吳苑積雨孤  
舟夢晉宮明日又從江上別曲闌愁倚送飛鴻

浮亭夜坐懷黃佐之

浮亭孤坐夜燈紅一倍離憂百感同春草綠波頻  
賦別流年青鏡暗驚蓬也知纓冕皆身外久憶心  
知向酒中此意謾勞題尺牘都門雪後有歸鴻

九日登絳月蘭若憶鄭二宣

微霜初下越王城衰病逢秋也自輕九日登臨多  
縱醉百年感慨獨鍾情斷蟬野寺黃花晚遠樹江  
天白雁晴却憶浮丘炎海上懶題詩句寄同聲

浮亭風雨夜集憶鄭二宣

天涯此別意何窮一片愁心萬里同明鏡曉霜驚  
白髮浮亭秋雨夢青楓書回絕島孤帆遠門掩寒  
塘舊業空說着登臨多感慨一緘封淚寄南鴻

過東林雙磎有懷舊遊

會於此地盍朋簪歲晏重來百感深門掩薄寒初  
暝雪樹含輕靄欲棲禽滄波涉海驚魂夢白髮看

山倦嘯吟聞說遠公能館我便投章甫臥東林

冬夜與高五秀才館林八員外宅

遠別悠悠歎二難多君畱飲故情歡生涯祗合尊  
前醉功業無勞鏡裏看落葉走階風動晚古梅臨  
水月侵寒何因得似龍門叟野艇終身一釣竿

與陳八參軍夜飲話舊

鄉園別後隔烽烟此日論交意惘然雁引歸心離  
海國杯斝好月醉霜天謀生自愧青雲後話舊多  
驚白髮前明日豫愁分手處憑君慷慨看龍泉

寄周一秀才佐兼呈陳八處士炫

薛老峰前夜詠詩若爲離別思淒其忝於詞客推  
前輩久約林僧恐後期澤國未霜楓落早山城上  
月鳥歸遲自慚淺薄非徐穉賴有陳蕃是故知

海口道上有述懷陳二宣

露下菰蒲有雁聲曉驂初發宿寒輕新知乍別孤  
吟倦舊國重來百感生黃葉閉門逢野寺白波侵  
郭見江城家林暫別堪惆悵翻憶浮丘海上行

將歸冶城畱別陳八炫林六敏

南宮歸後歲蹉跎此日逢君柰別何野館解鞍行  
客飯寒山對酒故人歌蒹葭水國孤鴻度柚橘霜

詩定卷七  
林疋馬過爲報已無軒冕夢清冷臺下臥烟蘿

憶龍門高逸人

浮亭露飲玉樽空千里心期此夕同海路想經春  
草綠越吟愁對夜燈紅他山花發鶯啼後別墅春  
歸積雨中聖代祇今無隱逸不應多病臥孤蓬

畢公房

躋閣攀巖入化城薜蘿高臥寄閑情孤窓上月分  
燈影亂葉隨風雜磬聲麋鹿自知懷野性簪珪何  
用紆虛名真僧出世心無事戒得水壺徹底清

謫居寄冶城同志

遠別悠悠泣路岐丹心雖有鬢毛衰阮籍猖狂緣  
世難叔牙感慨爲心知春城久判花前醉野館無  
由雪後期自愧不如閑草木也承雨露沐恩私

岳江蘭若送浦舍人歸晉陵分得衣字

離亭征騎曉駢駢正值關河朔雁飛白髮相看闔  
海別青山遙送晉陵歸江城雨外蓮峰出野寺霜  
前柿葉稀自愧忘情非上知臨岐唯有一沾衣

寄高逸人

離亭高倡久難酬明月心期戀舊遊泛臘酒香頻  
中聖流年花發總關愁山園裛露寒梨熟水國迎

霜晚稻收自愧湮沉向城市攄情唯有一登樓

賦得垂楊送客

客路垂楊最有情暖風吹綠漸冥冥雨深煬帝宮  
前見月落桓伊笛裏聽葉暗乍堪藏乳燕花飛終  
恨化浮萍分攜欲折長條贈愁絕河橋酒幔青

歸冶城辱羣公追餞至江心亭

梅風初熟布帆歸相送勞君到翠微遠樹啼鶯畱  
客醉高林深竹見僧稀江心絕島晴浮出雨外孤  
雲濕倦飛浦漱白鷗如有待想應知我拂朝衣

秋江離思圖

粵城衰柳拂金堤雨裏秋襟惜解攜客散江亭聞  
斷雁酒醒沙館候鳴雞楓橋夜冷吳謳起笠澤天  
寒楚望迷天路雲山從此別一封愁札爲君題

秋夜浦舍人見宿園亭分得天字

南宮飲散動經年此會羈魂各黯然霄漢故人誰  
更在江潭逐客自堪憐疎燈細雨開秋宴落葉驚  
風攪夜眠歸去晉陵成遠別好憑陽雁望南天

夕陽

抹野野山影欲收光浮鴉背去悠悠高城半落催  
鳴角遠浦初沉促繫舟幾處閨中關繡戶何人江



詩定卷七  
上倚朱樓淒涼獨有成陽陌芳草相連萬古愁

送林一歸山中

棟花雨裏醉逢迎南國看山又送行求侶暗驚春  
草色還家愁逐暮江聲殘陽向野聞邊笛遠樹登  
樓見海城誰念長沙遷謫久懶從季主問君平

晚日杉關

荒臺古道斂微曛馬上笳聲不可聞地自亂離民  
舍少山當閩楚客程分長林積雨寒爲雪深樹孤  
峯濕作雲愧我舊遊見關吏也將書劍學終軍

寄林一和深字

雨館張燈坐夜深故人相對醉成吟二毛已老漸  
看鏡四美難并愧盍簪澤國曉霜歸候雁縣城春  
樹變鳴禽賈生尚有長沙謫此日毋勞嘆陸沉

憶浮丘生往交州

旬日陰霖結不開窮居幽草亂侵堦也知白髮緣  
愁長無那青山與愿乖行阻看花攜濁酒臥聞啼  
鳥閉虛齋比來况與浮丘別一望南山一愴懷

出京同黃少府宿采石

南宮拜疏許歸休蘆荻滄江晚繫舟貰酒暫同牛  
渚詠曳裾無復鳳臺遊海門白湧潮頭急烟島紅

拖雨脚收不用臨流濯纓袂此心從此不驚鷗

新秋浮亭夜集分韻得催字

海國新涼一雁來衣冠高會壯懷開浮亭夜月樽  
前滿古樹秋聲笛裏哀白髮朋遊嗟落魄青山舊  
業怨低摧燈殘酒醒還成別刻漏應愁曉箭催

寄逸人高漫士

獨倚城南百丈闌粵鄉秋思浩漫漫平臺樹色催  
殘照近郭砧聲報早寒雲物正當搖落後關河終  
念別離難龍門別墅今宵月誰與相同把酒看

與黃一秀才輩雨夜浮亭小集憶鄭二

香炷燈殘意萬重與君共憶遠遊蹤尺書不到經  
春雁樽酒相逢話夜鐘風動樸枝翻暗鵲雨深沙  
井響鳴蛩自慚淺薄誰招隱尚掩丘樊學臥龍

五言排律

同陳秀才登虎頭巖

勝槩殊三島層闌敞八風雲霞開玉壘日月遶珠  
宮烏道蒼烟外軍城紫氣中山河襟帶遠樓觀画  
圖雄物候逢秋異登攀與子同憶家滄海闊懷古  
霸圖空地暖初聞雁江寒已落楓振雷隨急雨野  
日截殘虹歲月空流水飄零極轉篷江湖歸未就

徒此美漁翁

主屋山天壇

名嶽推王屋孤標跨杳冥深窺砥柱黑高並太行  
青分野連三晉風雲萃百靈鶴歸松已偃龍去水  
猶腥竈隱燒丹火龕餘煉髓經羽人金磬動應此  
禮寒星

劍閣秋陰圖

分野秦封盡山川蜀國雄塹江流地底劍閣起天  
中棧險崖頻轉蘿深月不通飛揚慙白帝開闢憶  
蠶叢氣候三秋異猿聲衆壑同棟雲常礙日岩樹

遍呼風客路隨飛鳥鄉心掛落楓茲非曠達士應  
此泣途窮

逢牛尊師

道逢牛道士把酒醉雲房龍問壺中訣人傳肘後  
方久知鳧是鳥更指石爲羊遣興聊題翰無言但  
括囊秋星明劍氣夜月釀丹光酣飲從傾倒神遊  
極混茫別情波渺渺歸路樹蒼蒼又櫂扁舟去尋  
雲到草堂

冬日同林秀才遊衍真觀

蓬島烟霞合琳宮日月開洞陰常積雪地古半藏

苔竹已成龍去人因訪鶴來欲飛王令鳥且醉葛  
洪杯菓熟經時換炊香待夢回晴光偏悅鳥臘色  
尚欺梅意靜寒泓水心同槁木灰鳳笙如可學吹  
月上瑤臺

重遊宿雲臺憶肅上人

昔日談經處今來獨上慵古臺黃葉積斜磴紫苔  
封片月疑禪觀孤雲想化蹤夜燈無續火秋院有  
鳴蛩人倚題詩竹誰栽出世松夕陽無限思幾杵  
莫天鐘

輓理上人

隻履歸何處懷師淚滿襟浮雲生滅性明月去來  
心閱世真如夢安禪不廢吟畱衣分法侶寫偈別  
朋簪雨蘚侵行跡風泉想梵音一燈寒竹暝雙樹  
落花深塔閉蟲粘戶巢空鶴避林歷峰山下路從  
此罷登臨

七言絕句

題吳江垂虹橋

雲帆秋晚過垂虹落日鯨波動遠風欲借仙家遼  
海鶴月明吹笛水晶宮

早行

前山樹暗月朧朧馬色雞聲共曉風不爲逢秋多  
感慨只緣身在別離中

將歸海上辱羣公相送至龍津

百尺雲帆掛海霞勞君相送到天涯重來應恐清  
秋晚落盡清香桂子花

宿逆旅聞泉聲

練瀑飛泉作雨聲樓虛月白旅魂驚相思不道無  
歸夢自是離人夢不成

下山尋朱繼

攜琴載酒遠尋君石徑人稀半夕曛縱醉也須上

山去莫教閒却半牀雲

題朱舍人爲史太守寫竹

舍人退食寫閒情公子開械玉雪清曾向鳳池同  
夜直掖垣梧竹總秋聲

題鄭昭甫寫張騫乘槎圖

袞袞黃河天上來茂陵底事望蓬萊早知轉望乘  
槎便虛築通天百尺臺

夢中仙遊

天葩小院敞雲屏鵲散星河逗客星欲識別來離  
思苦晚峰長學黛睂青

詩定卷七

三

詩定卷七

國家圖書館. NATIONAL CENTRAL LIBRARY, TAIWAN, R.O.C.

